



HITZARMENA

ARRASATEKO UDALA ETA AED ELKARTEARENARTEKOA, HAINBAT EKINTZA ELKARLANEAN ANTOLATU ETA FINANTZATZEKO

Arrasaten, bi mila eta hamaseiko uztailaren hogeita bederatzian.

BILERAN DIRA

Alde batetik, Eñaut Muxika Olasagasti, AED elkartearen lehendakaria, NA 72.573.788W duena, adinez nagusia, Arrasate Euskaldun Dezagun (AED) elkartearen izenean.

Eta, bestetik, Maria Ubarretxena Cid, Arrasateko Udalaren alkate-udalburua, haren izenean diharduena, horretarako behar bezala ahalmendua dago eta.

Bi aldeek hitzarmena egiteko eskuduntza eta gaitasuna aitortzen diote elkarri eta


AZALTZEN DUTE

Arrasate Euskaldun Dezagun (AED) elkarteak, sortu zenetik hona, hainbat kultura ekintza antolatu dituela, gaur egun ere antolatzen jarraitzen duela eta Arrasateko herria dela ekintza horien guztien onuraduna.

AED elkartearen urtetik urtera indartzen joan dela eta haren kultura zerbitzuek gero eta eragin handiagoa dutela, ezarpen eta onarpen sozial zabalak lortu dituzte eta.

Garrantzi handikoa deritzotela, batetik, AED elkarteak berak, irabazteko asmorik gabekoa izanik, egiten duen lan eskergari behar bezalako tratamendua ematen jarraitzeari eta, bestetik, bide batez, geroa ziurtatu eta sendotzeari ere.

Hori guztia dela eta, hitzarmen hau izenpetzen dute, klausula hauen arabera.





KLAUSULAK

Lehena. Hitzarmen honen helburua da AED elkarteak eta Arrasateko Udalak, elkarlanean eta AEDren ardurapean, 2016. urtean egingo dituzten jardueretarako diru laguntzak xedatzea.

Bigarrena. Hitzarmen honen bidez AED elkartearen jarduera arrunta lagunduko du diruz Arrasateko Udalak, bai eta *Zabar-Berri* egitasmoa ere.

Hirugarrena. Arrasateko Udalak 2016. urtean 39.845 €ko diru laguntza emango dio AEDri.

Laugarrena. Udalak babestutako ekintzen kartel iragarleetan eta, oro har, ekintza horien publizitatean babeslearen izena jarriko du AEDk.

Bosgarrena. Diru laguntzaren %60 ordainduko dio Udalak AEDri, hitzarmen hau sinatu eta berehala. Gainerakoa, urteko memoria aurkeztu ondoren.

Seigarrena. Aurtengo ekintzen azalpen-memoria aurkeztuko du AEDk datorren 2017ko urtarrilaren 15a baino lehen, dirulaguntza xede duten ekintzena eta elkarteak egindako ekintza guztiena; eta, horrekin batera, lortu dituen emaitzen balorazioa. Era berean, elkartearen finantza egoerak (egoeraren balantzea eta galera eta irabazien kontua) aurkeztuko ditu AEDk 2017ko maiatzaren 31 baino lehen. Kontu agiri horiek dagokion erregistro ofizialean izena behar bezala emanda daukan enpresa eskudun batek ikuskatuak egon behar dute, eta bertan erakundearen jarduera globalaren gastuak eta diru sarrerak aipatu behar dira. Entitate baten jarduera globalean sartzen badira diruz lagundutako programak laguntza izan ez duten programekin, aipatutako finantza egoera ikuskatuak aurkezteaz gain, lagundutako programei dagokien deskargu ekonomikoa aurkeztu beharko da, benetan sortu diren gastuak eta diru sarrerak adierazita, eta baita horiek egozteko erabili diren irizpideak ere. Halaber, diruz lagundutako jardueren azalpen memoria aurkeztu beharko da, eta, horrekin batera, baita lortutako emaitzen balorazioa ere.

Eta horrela jasota geratzeko eta adostasuna agertzeko, hitzarmen hau egin eta hasieran aipatutako toki-egunetan izenpetzen dute bileran direnek.

Eñaut Muxika Olasagasti
AEDko lehendakaria

Maria Ubarretxena Cid
Arrasateko Udaleko alkate-udalburua

